





李益集卷上

五言古詩

登長城

漢家今上郡秦塞古長城有日雲長慘無風沙自  
驚當今聖天子不戰四夷平

雜曲

妾本蠶家女不識貴門儀藁砧持玉斧交結五陵  
兒十日或一見九日在路歧人生此夫壻富貴欲  
何爲楊柳徒可折南山不可移婦人貴結髮寧有  
再嫁資嫁女莫望高女心願所宜寧從賤相守不



願貴相離藍葉鬱重重藍花若榴色少婦歸少年  
華光自相得誰言配君子以奉百年身有義即夫  
壻無義還他人愛如寒爐火棄若秋風扇山嶽起  
面前相看不相見丈夫非小兒何用強相知不見  
朝生菌易成還易衰征客欲臨路居人還出門北  
風河梁上四野愁雲繁豈不戀我家夫壻多感恩  
前程有日月勲績在河源少婦馬前立請君聽一  
言春至草亦生誰能無別情殷勤展心素見新莫  
忘故遙望孟門山殷勤報君子既爲隨陽鴈勿學  
西流水嘗聞生別離悲莫悲於此同器不同榮堂

下即千里與君貧賤交何異萍上水託身天使然  
同生復同死

送遼陽使還軍

征人歌且行北上遼陽城二月戎馬息悠悠邊草  
生青山出塞斷代地入雲平昔者匈奴戰多聞殺  
漢兵平生報國憤日夜角弓鳴勉君萬里去勿使  
虜塵驚

與僧法振同賦應門照綠苔

宮上何年月應門何歲苔清光一以照白露共徘徊  
珠履久行絕玉房重未開妾心正如此昭陽歌



吹來

賦得早燕送別

碧草縵如綫去來雙飛燕長門未有春先入班姬  
殿梁空繞復息簷寒窺欲遍今至隨紅萼昔還悲  
索扇一別無秋鴻差池詎相見

秋晚溪中寄懷大理齊司直

鳳翔屬明代羽翼文歲蕤崑崙進琪樹飛舞下瑤  
池振儀自西睽東分釐國典唯平法伊人方  
在斯荒寧析陽肅芳輝蘭玉滋明質鶯鶯高景飄颻  
服纓綏天寒清洛苑秋夕白雲司况復空巖側蒼

蒼幽桂期歲寒坐流霰山川猶別離浩思憑尊酒  
氛氲獨含辭

溪中月下寄楊子尉封亮

蘅若奪幽色銜思恍無棕宵長霜霧多歲晏淮海  
風團團山中月三五離夕同露凝朱絃絕觴至蘭  
玉空清光液流波盛明難再逢常恐河漢遠坐窺  
煙景窮小人諒處陰君子樹大功永願厲高翼慰  
我丹桂叢

春晚賦得餘花落

留春春竟去春去花如此蝶舞遶應稀鳥驚飛詎



已衰紅辭故萼繁綠扶凋藥自委不勝愁庭風那  
更起

聞亡友王七嘉禾寺得素琴

故人惜此去留琴明月前今來我訪舊淚灑白雲  
天詎欲匣孤響送君歸夜泉撫琴猶可絕况此故  
無絃何必雍門奏然後使潺湲

校書郎楊凝往年以古鏡貺別今追贈以

詩

明鏡出匣時明如雲間月一別青春檻回光照華  
髮美人惜自愛鞶帶手所結願以三五期經天無

玷缺

置酒

置酒命所歡憑觴遂爲戚日往不再來茲晨坐成  
昔百齡非久長五十將半百胡爲勞我形已鬢還  
復白西山鸞鶴群矯矯煙霧翮明明發金井陰洞  
潛水碧安得凌風羽崦嵫駐靈魄無然坐衰老慙  
嘆東陵栢

長杜竇明府宅夜送王屋道士常究子

日隨三鳥去羽節凌霞光暮與雙鳧宿雲車下紫  
陽天壇臨月近洞水出山長海嶠年年別丘陵徒



自傷

觀回軍

行行上隴頭隴月暗悠悠萬里將軍沒回旌壠戍  
秋誰令嗚咽水重入故宮流

華山南廟

陰山臨古道古廟閉山碧落日春草中  
塞芳薦瑤席明靈達精意髣髴如不隔  
巖雨神降時回颺入松柏常聞坑儒後  
此地返秦壁自古害忠良神其輔宗祐

喜邢校書遠至對雨同賦遠晚飯阮返五

韻

雀噪空城陰木衰羈思遠已蔽青山望徒悲  
白雲晚別離千里風雨中同一飯開徑說逢  
康臨觴方接阮旅宦竟何如勞飛思自返

城西竹園送裴佶王達

歲蕤凌風竹寂寞離人觴愴懷非外至沈鬱  
自中腸遠行從此始別袂重淒霜

月下喜邢校書至自洛

天河夜未央漫漫復蒼蒼重君遠行至及此  
明月光華星映衰柳暗水入寒塘客心定何  
似餘歡方



自長

北至太原

炎祚昔昏替皇基此鬱盤玄命久已集撫運良乃  
艱南阨羊腸險北走鴈門寒始於一戎定垂此億  
世安唐風本憂思王業寔艱難中曆雖橫潰天紀  
未可干聖明所興國靈嶽固不殫咄咄薄遊客斯  
言殊不刊

入華山訪隱者經仙人石壇

三考四嶽下官曹少休沐久負青山諾今還獲所  
欲常聞玉清洞金簡受玄籙夙駕昇天行雲遊恣

霞宿平明矯輕策捫石入空曲仙人古石壇苔遶  
青瑤局陽桂凌煙紫陰蘿冒水綠隔世聞丹經懸  
泉注明玉前驚羽人會白日天居肅問我將致辭  
笑之自相目竦身雲遂起仰見雙白鵠墮其一紙  
書文字類鳥足視之了不識三返又三復歸來問  
方士舉世莫解讀何必若蜉蝣然後爲跼促鄙哉  
宦遊子身志俱降辱再往不及期勞歌叩山木

罷鏡

手中青銅鏡照我少年時衰颯一如此清光難復  
持欲令孤月掩從遣半心疑縱使逢人見猶勝自



見悲

華陰東泉同張處士詣藏律師兼簡縣內  
同官因寄齊中書

蒼崖抱寒泉淪照洞金碧潛鱗孕明晦山靈閔幽  
曠前峯何其詭萬變窮日夕松老風易悲山秋雲  
更白故人中邑吏五里仙霧隔美質簡瓊瑤英聲  
缺金石煩君竟相問問我此何適我因贊時理書  
寄西飛翮哲匠熙百工日月被光澤大國本多士  
荆岑無遺壁高網彌八紘皇圖明四闢群材旣兼  
暢顧我在草澤貴無身外名賤有區中役忽忽百

齡內殷殷千慮迫人生已如寄在寄復爲客舊國  
不得歸風塵滿阡陌

答郭黃中孤雲首章見贈

孤雲生西北從風東南飄帝鄉日已遠蒼梧無還  
颺已矣玄鳳嘆嚴霜集靈若君其勉我懷歲暮孰  
不凋

合源溪期張計不至

霜露肅時序緬然方獨尋暗溪遲仙侶寒澗聞松  
禽寐歷茲夜永清明秋序深微波澹澄夕煙景含  
虛林素志久淪否幽懷方自吟



竹溪

訪竹越雲崖即林若溪絕寧知修幹下漠漠秋苔  
潔清光溢空曲茂色臨幽澈採摘愧芳鮮奉君歲  
暮節

送諸暨王主簿之任

別愁已萬緒離曲方三奏遠宦一辭鄉南天異風  
風候秦城歲芳老越國春山秀落日望寒濤公門  
閑清晝何用慰相思裁書寄關右

罷秩後入華山採茯苓逢道者

委綬來名山觀音恣所停山中若有聞言此不死

庭遂逢五老人一謂西嶽靈或聞樵人語飛去入  
昇星授我出雲路蒼然凌石屏視之有文字乃古  
黃庭經左右長松列動搖風露零上蟠千年枝陰  
虬負青冥下結九秋霰流膏爲茯苓取之砂石間  
異若龜鶴形况聞秦宮女華髮變已青有如上帝  
心與我千萬齡如疑有仙骨鍊魂可永寧何事逐  
豪遊飲啄以羶腥神物亦自悶風雷護此肩欲傳  
山中寶回策忽已暝乃悲世上人求醒終不醒  
自朔方還與鄭式瞻崔稱鄭子周岑贊同  
會法雲寺三門避暑



予本疎放士竭來非外矯誤落邊塵中愛山見山  
少始投清涼宇門值煙岫表參差牙明滅彩翠竟  
昏曉泠泠遠風來過此群木杪英英二三彥襟曠  
去煩擾游川出潛魚息陰勸飛鳥徇物不可窮唯  
於此心了

### 來從竇車騎行

束髮逢世屯懷恩抱明義讀書良有感學劍慙非  
智遂別魯諸生來從竇車騎追兵赴邊急絡馬黃  
金轡出入燕南陲由來重意氣自經臯蘭戰又破  
樓煩地西北護三邊東南留一尉時過歛如雲參

差自不意將軍失恩澤萬事從此異置酒高臺上  
薄暮秋風至長戟與我歸騎來同棄置自酌還自  
飲非名又非利歌出易水寒琴下雍門淚出逢平  
樂舊言在天階侍問我從軍苦自陳少年貴丈夫  
交四海徒論身自致漢將不封侯蘇卿勞遠使今  
我終此曲此曲誠不易貴人難識心何由知忌諱

### 夜發軍中

邊馬櫪上驚雄劍匣中鳴半夜軍書至匈奴寇六  
城中間分暗陣太乙起神兵出沒風雲合蒼黃豺  
虎爭今日邊庭戰緣賞不緣名



將赴朔方早發漢武

弭蓋出故關窮秋首邊路問我此何爲平生重一  
顧風吹山下草繫馬河邊樹奉役良有期回瞻終  
未屢去鄉幸未遠戎衣今已故豈惟幽朔寒念我  
機中素去矣勿復言所酬知音遇

城傍少年

生長邊城傍出身事弓馬少年有膽氣獨獵陰山  
下偶與匈奴逢曾擒射鵬者名懸壯士籍請君少  
相假

游子吟

女羞夫壻薄客耻主人賤遭遇同衆流低回媿相  
見君非青銅鏡何事空照面莫以衣上塵不謂心  
如練人生當榮盛待士勿言倦君看白日馳何異  
絃上箭

飲馬歌

百馬飲一泉一馬爭上游一馬噴成泥百馬飲濁  
流上有滄浪客對之空嘆息自顧纓上塵徘徊終  
日夕爲問泉上翁何時見沙石

蓮塘驛

五月渡淮水南行遶山陂江村遠鷄應竹裏聞綠



絲楚女肌髮美蓮塘煙露滋菱花覆碧渚黃鳥雙  
飛時渺渺沂洄遠憑風託微詞斜光動流睇此意  
難自持女歌本輕艷客行多怨思女蘿蒙幽蔓擬  
上青桐枝

七言古詩

登夏州城觀送行人賦得六州胡兒歌

六州胡兒六蕃語十歲騎羊逐沙鼠沙頭牧馬孤  
鴈飛漢君遊騎貂錦衣雲中征戍三千里今日征  
行何歲歸無定河邊數株柳共送行人一杯酒胡  
兒起作和蕃歌齊唱嗚嗚盡垂手心知舊國西州

遠西向胡天望鄉久回頭忽作異方聲一聲回盡  
征人首蕃音虜曲一難分似說邊情向塞雲故國  
關山無限路風沙滿眼堪斷魂不見天邊青作塚  
古來愁殺漢昭君

從軍夜次六胡北飲馬磨劍石爲祝殤辭

我行空磧見沙之磷磷與草之冪冪半沒胡兒磨  
劍石當時洗劍血成川至今草與沙皆赤我因扣  
石問以言水流嗚咽幽草根君寧獨不恠陰燐吹  
火熒熒又爲碧有鳥自稱蜀帝鬼南人伐竹湘山  
下交根接葉滿淚痕請君先問湘江水然我此恨



乃可論秦亡漢絕三十國關山戰死知何極風飄  
雨灑水自流此中有寃消不得爲之殫劍作哀吟  
風沙四起雲沉沉滿營戰馬嘶欲盡畢鼎不見胡  
天陰東征曾弔長平苦徃徃晴明獨風雨年移代  
去感精魂空山月暗聞鼙鼓秦坑趙卒四十萬未  
若格鬪傷戎虜聖君破胡爲六州六州又盡爲胡  
丘韓公三城斷胡路漢甲百萬屯邊秋乃分司空  
授朔土擁以玉節臨諸侯漢爲一雪萬世讎我今  
抽刀勒劍石告爾萬世爲唐休又聞招魂有美酒  
爲我澆酒祝東流殤爲魂兮可以還故鄉些沙場

地無人兮爾獨不可以久留

登天壇夜見海

朝遊碧峯三十六夜上天壇月邊宿仙人携我攀  
玉英壇上夜半東方明僊鐘撞撞近海日海中離  
離三山出霞梯赤城遙可分霓旌絳節倚彤雲八  
鸞五鳳紛在御王母欲上朝元君群仙指此爲我說  
幾見塵飛滄海竭竦身別我期丹宮空山處處遺  
清風九州下視杳未旦一半浮生皆夢中始知武  
皇求不死去逐瀛洲羨門子

大禮畢皇帝御丹鳳門改元建中大赦



大明曠曠天地分六龍負日升天門鳳凰飛來銜  
帝籙言我萬代金皇孫靈雞鼓舞承天赦高翔百  
尺垂朱幡宸居穆清受天曆建中甲子合上元昊  
穹景命即已至王事乃可酬乾坤中升告成答玄  
貺泥金檢玉昭鴻恩云亭之事畧可記七十二君  
寧獨尊小臣有上封禪表久而未就歸陵園

輕薄篇

豪不必馳千騎雄不在垂雙鞬天生俊氣自相逐  
出與鷗鷺同飛翻朝行九衢不得意下鞭走馬城  
西原忽聞燕鴈一聲去回鞍挾彈平陵園歸來青

樓曲未卒美人玉色當金尊淮陰少年不相下酒  
酣半笑倚市門安知我有不平色白日欲落紅塵  
昏死生容易如反掌得意失意由一言少年但飲  
莫相問此中報讎亦報恩

野田行

日沒出古城野田何茫茫寒狐嘯青塚鬼火燒白  
楊昔人未爲泉下客行到此中曾斷腸

古別離

雙劍欲別風淒然雌沉水底雄上天江回漢轉兩  
不見雲交雨合知何年古來萬事皆由命何用臨



歧苦涕漣

李益集卷上

李益集卷下

五言律詩

竹牕聞風寄苗發司空曙

微風驚暮坐臨牖思悠哉  
開門復動竹疑是故人來  
時滴枝上露稍沾堦下苔  
何當一入幌為拂綠琴埃

賦得垣衣

漠漠復霏霏為君垣上衣  
昭陽輦下草應笑此生非  
掩藹青春去蒼茫白露稀  
猶勝萍逐水流浪不相依



送人流貶

漢章雖約法秦律已除名謗遠人多惑官微不自  
明霜風先獨樹瘴雨失荒城疇昔長沙事三年召  
賈生

送人南歸

人言下江疾君道下江遲五月江路惡南風驚浪  
時應知近家喜還有異鄉悲無柰孤舟夕山歌聞  
竹枝

水亭夜坐賦得曉霧

月落寒霧起沈思浩通川宿禽轉木散山澤一蒼

然漠漠沙上路云云洲外田猶當依遠樹斷續欲  
窮天

送常曾侍御使西蕃寄題西川

涼王宮殿盡蕪沒隴雲西今日聞君使雄心逐鼓  
鼙行當收漢壘直可取蒲泥舊國無由到煩君下  
馬題

入南山全師蘭若

木墮水歸壑窅然無念心南行有真子被褐息山  
陰石路瑤草散松門寒景深吾師亦何授自起定  
中吟



送韓將軍還邊

白馬羽林兒揚鞭薄暮時  
獨將輕騎出暗與伏兵  
期雨雪移軍遠旌旗上  
隴遲聖心戎寄重未許讓  
恩私

晚春卧病喜振上人見訪

卧牀如舊日窺戶易傷春  
靈壽扶衰力芭蕉對病  
身道心空寂寞時物自芳  
新旦夕誰相訪唯當攝  
上人

春行

侍臣朝謁罷戚里自相過  
落日青絲騎春風白苧

歌恩承三殿近獵向五陵  
多歸路南橋望垂楊拂  
細波

洛陽河亭奉酬留守群公追送

離亭餞落暉臘酒減春衣  
歲晚煙霞重川寒雲樹  
微戎裝千里至舊路十年  
歸還似汀洲鴈相逢又  
背飛

尋紀道士偶會諸叟

山陰尋道士映竹羽衣新  
侍坐雙童子陪遊五老  
人水松花下靜壇草雪中  
春見說桃源洞如今猶  
避秦



同蕭鍊師宿太乙廟

微月空山曙春祠謁少君落花壇上拂流水洞中  
聞酒引芝童奠香餘桂子焚鶴飛將羽節遙向赤  
城分

送同落第東遊

東門有行客落日滿前山聖代誰知者滄洲今獨  
還片雲歸海暮流水背城閒余亦依嵩頰松花深  
閉關

送柳判官赴振武

邊庭漢儀重旌甲似雲中虜地山川壯單于鼓角

雄關寒塞榆落月白胡天風君逐嫖姚將麒麟有  
戰功

述懷寄衡州令狐相公

調元方翼聖軒蓋忽言東道以中樞密心將外理  
同白頭生遠浪丹葉下高楓江上蕭疎雨何人對  
謝公

喜入蘭陵望紫閣峰呈宣上人

薙草開三徑巢林喜一枝地寬留種竹泉淺欲開  
池紫閣當踈牖青松入壞籬從今安僻陋蕭相是  
吾師



喜見外弟又言別

十年離亂後長大一相逢問姓驚初見稱名憶舊容  
別來滄海事語罷暮天鐘明日巴陵道秋山又幾重

立春日寧州行營因賦朔風吹飛雪

邊聲日夜合朔風驚復來龍山不可望千里一徘徊  
捐扇破誰執素紈輕欲裁非時妬桃李自是舞陽臺

又獻劉濟

草綠古燕州鶯聲引獨遊鴈歸天北畔春盡海西

頭向日花偏落馳年水自流感恩知有地不上望京樓

哭栢巖禪師

遍與傍人別臨終書不愁影堂誰爲掃坐塔自看修  
白日鐘邊晚青苔鉢上秋天涯禪弟子空到栢巖遊

五言排律

宿馮翊夜雨贈主人

危心驚夜雨起望漫悠悠氣耿殘燈暗聲繁高樹  
秋涼軒辭夏扇風幌攬輕裯思緒逢初斷歸期燕



暫留關山藹已失臉淚迸難收賴君時一笑方能  
解四愁

送襄陽李尚書

天寒發梅柳憶昔到襄州樹暖燃紅燭江清展碧  
油風烟臨峴首雲水接昭丘俗尚春秋學詞稱文  
選樓都門送旌節符竹領諸侯漢沔分戎寄黎元  
減聖憂時追山簡興本自習家流莫廢思康樂詩  
情滿沃洲

春日晉祠同聲會集得踈字韻

風壤瞻唐本山祠閱晉餘水亭開帟幕巖榭引簪

裾地綠苔猶少林黃柳尚踈菱苕生皎鏡金碧照  
澄虛翰苑聲何舊賓筵醉止初中州有遼鴈好爲  
繫邊書

七言律詩

同崔邠登鸛雀樓

鸛雀樓西百尺墻汀洲雲樹共茫茫漢家簫鼓空  
流水魏國山河半夕陽事去千年猶恨速愁來一  
日即爲長風煙併是思歸望遠目飛春亦自傷

奉酬崔員外副使携琴宿使院見示

忽聞此夜携琴宿遂歎常時塵吏暄庭木已衰空



月亮城砧自急對霜繁猶持副節留軍府未薦高  
詞直掖垣誰問南飛長繞樹官微同在謝公門

送賈校書東歸寄振上人

北風吹鴈數聲悲况指前林是別時秋草不堪頻  
送遠白雲何處更相期山隨匹馬行看暮路入寒  
城獨去遲爲問東州故人道江淹已擬惠休詩

過馬嵬二首

路至墻垣問樵者顧予云是太真宮太真血染馬  
蹄盡朱閣影隨天際空丹壑不聞歌吹夜玉堦唯  
有薜蘿風世人莫重霓裳曲曾致干戈是此中

金甲銀旌盡已回蒼茫羅袖隔風埃濃香猶自隨  
鸞輅恨魄無由離馬嵬南內真人悲帳殿東溟方  
士問蓬萊唯留坡畔鬢環月時送殘輝入夜臺

五言絕句

賦得路傍一株柳送邢校書赴延州使府  
路傍一株柳此路向延州延州在何處此路起悠  
悠

重贈邢校書

俱從四方士共會九秋中斷蓬與落葉相值各因  
風



照鏡

衰髮朝臨鏡將看各自疑  
慙君明似月照我白如  
絲

書院無曆日以詩代書  
問路侍御六月大  
小

野性迷堯曆松牕有道經  
故人為柱吏為我數堦  
堦

聞鷄贈主人

嘒嘒司晨鳴報爾東方旭  
無事戀君軒令君重鳧  
鵠

登白樓見白鳥席上命鷓鴣辭

一鳥如霜雪飛向白樓前  
問君何以至天子太平  
年

石樓山見月

紫塞連年成黃砂磧路窮  
故人今夜宿見月石樓  
中

惜春傷同幕故人孟郎中  
兼呈去年看花  
友

畏老身全老逢春解惜春  
今年看花伴已少去年  
人



嘉禾寺見亡友題壁

今日憶君處憶君君豈知空餘暗塵字讀罷淚仍垂

聽唱赤白桃李花

赤白桃李花先皇在時曲欲向西宮唱西宮官樹綠

江南詞

嫁得瞿塘賈朝朝悞妾期早知潮有信嫁與弄潮兒

贈內兄盧綸

世故中年別餘生此會同却將悲與病來對朗陵翁

天津橋南山中

野坐分苔席山行遶菊叢雲衣惹不破秋色望來空

答竇二曹長留酒還榼

榼小非由榼星郎是酒星解醒元有數不用嚇劉伶

答廣宣供奉問蘭陵居

居址有朝路居南無住人勞師問家第山色是南



鄰

乞寬禪師瘦山疊呈宣供奉

石色凝秋蘚峰形若夏雲誰留秦苑地好贈杏溪君

觀騎射

邊頭射鵬將走馬出中軍遠見平原上翻身向暮雲

幽州賦詩見意時佐劉幕

旌戍在桑乾年年薊水寒殷勤驛西路北去向長安

軍次陽城烽舍北流泉

何地可潛然陽城烽樹邊今朝望鄉客不飲北流泉

七言絕句

度破訥沙二首

眼見風來沙旋移經年不省草生時莫言塞北無春到總有春來何處知

破訥沙頭鴈正飛鷓鴣泉上戰初歸平明日出東南地滿積寒光生鐵衣

拂雲堆



漢將新從虜地來，旌旗半上拂雲堆。  
單于每近沙場獵，南望山陰哭始回。

中橋北送穆質兄弟應制戲贈蕭二策

洛水橋邊鴈影踈，陸機兄弟駐行車。  
欲陳漢帝登封草，猶待蕭郎寄內書。

九月十日雨中過張伯佳期柳鎮未至以

詩招之

柳吳興近無消息，張長公貧苦寂寥。  
唯有角巾霑雨至，手持殘菊向西招。

汴河曲

汴水東流無限春，隋家宮闕已成塵。  
行人莫上長堤望，風起楊花愁殺人。

塞下曲四首

蕃州部落能結束，朝暮馳獵黃河曲。  
燕歌未斷塞鴻飛，牧馬群嘶邊草綠。

秦築長城城已摧，漢武北上單于臺。  
古來征戰虜不盡，今日還復天兵來。

黃河東流流九折，沙場埋恨何時絕。  
蔡琰沒去造胡笳，蘇武歸來持漢節。

為報如今都護雄，匈奴且莫下雲中。  
請書塞北陰



山石願比燕然車騎功

夜上西城聽梁州曲二首

行人夜上西城宿聽唱梁州雙筦逐此時秋月滿  
關山何處關山無此曲  
鴻鴈新從北地來聞聲一半却飛回金河戍客腸  
應斷更在秋風百尺臺

暖川

胡風凍合鷓鴣泉牧馬千羣逐暖川塞外征行無  
盡日年年移帳雪中天

過馬嵬

漢將如雲不直言寇來翻罪綺羅恩託君休洗蓮  
花血留記千年妾淚痕

答許五端公馬上口號

晚逐旌旗俱白首少遊京洛共緇塵不堪身外悲  
前事強向杯中覓舊春

牡丹

紫萼叢開未到家却教遊客賞繁華始知年少求  
名處滿眼空中別有花

邊思

腰懸錦帶佩吳鉤走馬曾防玉塞秋莫笑關西將



家子祗將詩思入涼州

奉賀成相公春晚聞鶯

蜀道山川心易驚  
綠牕殘夢曉聞鶯  
分明似雪文君恨  
萬怨千愁絃上聲

送客還幽州

惆悵秦城送獨歸  
薊門雲樹遠依依  
秋風莫射南來鴈  
從遣乘春更北飛

楊柳送客

青楓江畔白蘋洲  
楚客傷離不待秋  
君見隋朝更何事  
柳楊南渡水悠悠

從軍北征

天山雪後海風寒  
橫笛偏吹行路難  
磧裏征人三十萬  
一時回向月明看

聽明角

繁霜一夜落庭蕪  
吹角當城漢月孤  
無限塞鴻飛不度  
秋風卷入小單于

宮怨

露濕晴花春殿香  
月明歌吹在昭陽  
似將海水添宮漏  
共滴長門一夜長

莫過回樂烽



烽火高飛百尺臺黃昏遙自磧西來昔時征戰回  
應樂今日從軍樂未回

奉和武相公郊居寓目

黃扉晚下禁垣鍾歸坐南闈山萬重獨有月中高  
興盡雪峯明處見寒松

詣紅樓院尋廣宣不遇留題

柿葉翻紅霜景秋碧天如水倚紅樓隔窓愛竹無  
人問遣向鄰房覓戶鈎

回軍行

關城榆葉早疎黃日暮沙一古戰場表請回軍掩

塵骨莫教士卒哭龍荒

邠寧春日

桃李年年上國新風沙日日塞垣人傷心更見庭  
前柳忽有千條欲占春

古瑟怨

破瑟悲秋已減絃湘靈沉怨不知年感君拂拭遺  
音在更奏新聲明月天

觀石將軍舞

微月東南上戍樓琵琶起舞錦纏頭更聞橫笛關  
山遠白草胡沙西塞秋



春夜聞笛

寒山吹笛喚春歸  
遷客相看淚滿衣  
洞庭一夜無窮鴈  
不待天明盡北飛

揚州送客

南行直入鷓鴣群  
萬歲橋邊一送君  
聞道望鄉聞不得  
梅花暗落嶺頭雲

統漢峰下

統漢峰西降戶營  
黃河戰國擁長城  
只今已勒燕然石  
此地無人空月明

避暑女冠

霧袖煙裙雲母冠  
碧琉璃簾井冰寒  
焚香欲使三清鳥  
靜拂桐陰上玉壇

行舟

柳花飛入正行舟  
卧引菱花信碧流  
聞道風光滿揚子  
天晴共與望鄉樓

隋宮燕

燕語如傷舊國春  
宮花一落旋成塵  
自從一閉風光後  
幾度飛來不見人

送人歸岳陽

煙草連人楓樹齊  
岳陽歸路子規啼  
春江萬里巴



陵戍落日看沉碧水西

上汝州郡樓

黃昏鼓角似邊州三十年前上此樓今日山城對  
垂淚傷心不獨爲悲秋

臨滹沱見蕃使列名

漠南春色到滹沱碧柳青青塞馬多萬里江山今  
不閉漢家頻許郅支和

寫情

水紋珍簾思悠悠千里嘉期一夕休從此無心愛  
良夜任他明月下西樓

夜上受降城聞笳

回樂烽前沙似雪受降城上月如霜不知何處吹  
蘆管一夜征人盡望鄉

赴渭北宿石泉驛南望黃堆烽

邊城已在虜城中烽火南飛入漢宮漢庭議事先  
黃老麟閣何人定戰功

拾遺

效古促促曲爲河上思婦作

促促何促促黃河九回曲嫁與棹船郎空牀時影  
宿不道君心不如石那令妾貌長如玉



赴邠寧留別

身承漢飛將束髮即言兵俠少何相問從來事不  
平黃雲斷朔吹白雪擁沙城幸應邊書募橫戈會  
取名

再赴渭北使府留別

結髮逐鳴輦連兵追谷蠡山川搜伏虜鎧甲被重  
犀故府旌旗在新軍羽板齊報恩身未死識路馬  
還嘶列嶂高峰舉當營太白低平戎七尺劍封檢  
一丸泥截海取蒲類跑泉飲鷓鴣漢庭中選重更  
事五原西

鹽州過胡兒飲馬泉

綠楊著水草如煙舊是胡兒飲馬泉幾處吹笳明  
月夜何人倚劍白雲天從來凍合關山路今日分  
流漢使前莫使行人照容鬢恐驚憔悴入新年



Blank manuscript page with vertical columns.





